



李嘉祐集卷上

七言古詩

江上曲

江心澹澹芙蓉花江口蛾眉獨浣沙可憐應是陽
臺女坐對鸕鷀嬌不語掩面羞看北地人迴身忽
作巫山雨蒼梧秋色不堪論千載依依帝子魂君
看峰上斑斑竹盡是湘妃泣淚痕

傷吳中

館娃宮中春已歸闔閭城頭鶯已飛復見花開人
又老橫塘窈窕柳依依憶昔吳王在宮闕館娃賣

眼看花發舞袖朝欺陌上春歌聲夜怨江邊月古
來人事亦猶今莫厭清觴與綠琴獨向西山聊一
笑白雲芳草自知心

夜聞江南賽神即事

南方淫祀古風俗楚姬能唱迎神曲鎗鎗銅鼓蘆
葉深寂寂瓊筵江上綠雨過風清洲渚閑柁漿醉
盡神欲還帝女凌空下湘岸畚君隔浦向堯山月
隱回塘猶自舞一門依倚神之祐韓康靈藥不復
求扁鵲醫方曾莫覩逐客臨江空自悲月明流水
無已時聽此迎神送神曲携觴欲弔屈原祠

雜興

花間昔日黃鸝囀妾向青樓已生怨花落黃鸝不
復來妾老君心亦應變君心比妾心妾意舊來深
一別十年無尺素歸時莫贈路傍金

古興

十五小家女雙鬟人不如蛾眉暫一見可直千金
餘自從得向蓬萊裡出入金輿乘玉趾梧桐樹上
春鴉鳴曉伴君王猶未起莫道君恩長不休婕妤
團扇苦悲秋君看魏帝鄴都裏唯有銅臺漳水流
五言律詩

送韋邕少府歸鍾山

祁門官罷後負笈向桃源萬卷長開帙千峰不閉
門綠楊垂野渡黃鳥傍山村念爾能高枕丹墀會
一論

送盧員外往饒州

爲郎復典郡錦帳映朱輪露冕隨龍節停撓得水
人早霜蘆葉變寒雨石榴新莫恠諳風土三年作
逐臣

送裴五歸京口

君罷江西日家貧爲一官還歸五陵去只向遠峯

看暮色催人別秋風待雨寒遙知到三徑惟有菊
花殘

送嚴維歸越州

艱難只用武歸向浙河東松雪千山暮林泉一水
通鄉心綠綠草野思看青楓春日偏相憶裁書寄
剡中

送杜士瞻楚州覲省

風流與才思俱似晉時人淮月歸心速江花入興
新雲深滄海暮柳暗白田春共道官猶小憐君孝
養親

送裴宣城上元所居

水流過海稀爾去換春衣
淚向檳榔盡身隨鴻鴈歸
草思晴後發花怨雨中飛
想到金陵渚酣歌對落暉

留別毘陵諸公

久別涪陽令丹墀忽再還
淒涼辭澤國離亂到鄉山
北固灘聲滿南徐草色閒
知心從此別相憶鬢毛斑

送獨孤拾遺先輩赴上都

行春秋已晚桂檝逐寒煙
轉曲遙峯出看濤極浦連
入京當獻歲封事更聞天
日日趨黃閣應忘雲海邊

常州韋郎中汎舟見餞

主人馮軾貴送客汎舟稀
逼岸隨芳草迴撓背落暉
映花雙節駐臨水伯勞飛
醉與群公狎春塘露冕歸

送崔侍御入朝

十年猶執憲萬里獨歸春
舊國無芳草青雲見故人
潘郎今髮白陶令未家貧
相送臨京口停撓淚滿巾

送岳州司馬弟之任

嶽陽天水外念爾一帆過野墅人煙迥山城鴈影
多有時巫峽色終日洞庭波丞相今爲郡應無勞
者歌

裴侍御見贈斑竹杖

騷人誇竹杖贈我意何深萬點湘妃淚三年賈誼
心願持終白首誰道貴黃金他日歸愚谷偏宜綠
綺琴

送張觀歸袁州

羨爾湘東去煙花尚可親綠芳深映馬遠岫迤迎

人饑猶啼初日殘鶯惜暮春遙憐謝客興佳句又
應新

冬夜饒州使堂餞相公五叔赴歙州

丞相過邦牧清絃送羽觴高情同客醉子夜爲人
長斜漢初過斗寒雲正護霜新安江自綠明主待
惟良

蔣山開善寺

山殿秋雲裏香煙出翠微客尋朝磬至僧背夕陽
歸下界千門在前朝萬事非看心兼送日葭莢自
依依

晚發江寧道中呈嚴維

惆悵遙江路蕭條落日過蟬鳴獨樹急鴉向古城
多轉曲隨青嶂因高見白波潘生秋徑草嚴子意
如何

句容縣東青陽館作

句曲千峯暮歸人向遠煙風搖近水葉雲護欲霜
天夕照留山館秋花落野田征途傍斜日一騎獨
翩翩

晚春宴無錫蔡明府西亭

茅簷閒寂寂無事覺人和井近時澆圃城低下見

河興緣芳草積情向遠峰多別日歸吳地停撓更
一過

送王端赴朝

君承明主意日日上丹墀東閣論兵後南宮草奏
期人稀傍河處槐暗入關時獨遣吳州客平陵結
夢思

送王正字山寺讀書

欲究先儒教還過支遁居山階閒聽法竹徑獨看
書向日荷新卷迎秋柳半踈風流有佳句不似帶
經鋤

送房明府罷長寧令之湖州客舍

君爲萬里宰恩及五湖人未滿先求退歸閒不厭
貧遠峰晴更近殘柳雨還新妄自趨丹陛明年雞
樹親

詠螢

映水光難定凌虛體自輕夜風吹不滅秋露洗還
明向燭仍藏焰投書更有情猶將流亂影來此傍
簷楹

送李中丞

射策名先著論兵氣自雄能全季布諾不道魯連
功流水兼葭外諸山睥睨中別君秋日晚回首夕
陽空

至七里灘作

遷客投干越臨江淚滿衣獨隨流水遠轉覺故人
稀萬木迎秋序千峰駐晚暉行舟猶未已惆悵暮
潮歸

南浦渡口

寂寞橫塘路新篁覆水低東風潮信滿時雨稻稭
齊寡婦供租稅漁人逐鼓鼙慙無卓魯術解印謝
黔黎

暮秋遷客增思寄京華

宋玉怨三秋張衡復四愁思鄉鴈北至欲別水東
流倚樹看黃葉逢人訴白頭佳期不可失落日自
登樓

送蘇脩往饒

愛爾無羈束雲山恣意過一身隨遠岫孤棹任輕
波世事關心少漁家寄宿多蘆花泊舟處江月柰
人何

題王十九茅堂

滿庭多種藥人里作山家終日能留客凌寒亦對

花海鷗過竹嶼門柳拂江沙知爾卑棲意題詩美
白華

送弘志上人歸湖州

山林唯幽靜行住不妨禪高月穿松逕殘陽過水
田詩從宿世悟法爲本師傳能使南人敬修持香
火緣

送陸士倫宰義興

陽羨蘭陵近高城帶水閒淺流通野寺綠茗蓋春
山長吏先愁罷遊人詎肯還知君日清淨無事掩
重關

和張舍人中書宿直

漢主留才子春城直紫微對花閭闔靜過竹吏人
稀裁詔催添燭將朝欲更衣玉堂宜歲久且莫厭
彤闈

司勳王郎中宅送韋九郎往濠州

憐爾因同舍看書似外家出關逢落葉傍水見寒
花送遠添秋思將衰念歲華清淮倍相憶迴首莫
令賒

晚春送吉校書歸楚

詩人饒楚思淮上及春歸舊浦菱花待閉門柳絮

飛高名鄉曲重少事道流稀定向漁家醉殘陽卧
釣磯

故國相公挽歌二首

文若爲全德留侯是重名論公長不幸因病得無
生大夢依然定高墳共化成自應憐寤滅人世但
傷情

共美持衡日皆言折檻時蜀侯供廟略漢主缺台
司車馬行仍止笳簫咽又悲今年杜陵陌殄瘁百
花遲

送嚴二擢第東歸

曠官就賓薦時輩詎爭先盛業推儒行高科獨少年
迎秋見衰葉餘照逐鳴蟬舊里三峰下開門古
縣前

送冷朝陽及第歸江寧

高第猶佳句諸生似者稀長安帶酒別建業候潮
歸稚子歡迎棹鄰人爲埽扉含情過舊浦鷗鳥亦
依依

送越州辛法曹之任

但能一官適莫羨五侯尊山色垂趨府潮聲自到
門綠塘剡溪路映竹五湖村王謝登臨處依依今

尚存

送樊兵曹之潭州謁韋大夫

塞鴻歸欲盡北客始辭秦零桂雖逢竹湘川少見
人江花鋪淺水山木暗殘春修刺轅門裏多憐爾
爲親

送杜侍御還廣陵

慙君從弱歲願我比諸昆同事元戎久俱承國士
恩隨鷺過淮水看柳向轅門草色金陵岸思心那
可論

送兗州杜別駕之任

李鼎祚集卷一
停車邀別乘，促軫奏胡笳。若見楚山暮，應愁浙水
餘。河堤經淺草，村徑歷繁花。更有堪悲處，梁城春
日斜。

題裴十六少卿東亭

平津舊東閣，深巷見南山。卷箔嵐煙潤，遮窓竹影
閒。傾茶兼落帽，戀客不開關。斜照窺簷外，川禽時
往還。

同皇甫侍御題薦福寺一公房

虛室獨焚香，林空靜磬長。閑窺數竿竹，老在一繩
牀。啜茗翻真偈，燃燈繼夕陽。人歸遠相送，步履出

迴廊

送從姪端之東都

虜近人行少，憐君獨出城。故關逢落葉，寒日逐徂
征。聞笛添歸思，看山愜野情。皇華今絕少，龍額也
相迎。

送王諫議充東都留守判官

時稱謝康樂，別事漢平津。衰柳寒關道，高車左掖
臣。背河看北鴈，到洛問東人。憶昔遊金谷，相看華
髮新。

和都官苗員外秋夜寓直對雨

多雨南宮夜仙郎寓直時漏長丹鳳闕秋冷白雲
司螢影侵堦亂鴻聲出苑遲蕭條吏人散小謝有
新詩

送從弟歸河朔

故鄉那可到令弟獨能歸諸將矜旄節何人重布
衣空城流水在荒澤舊村稀秋日平原路蟲鳴桑
葉飛

送崔夷甫員外和蕃

君過湟中去尋源未是賒經春逢白草盡日度黃
沙雙節行爲伴孤峰到似家和戎非用武不學李

輕車

春日長安送從弟尉吳縣

春愁能浩蕩送別又如何人向吳臺遠鶯飛漢苑
多見花羞白髮因爾憶滄波好是神仙尉前賢亦
未過

元日無衣冠入朝寄皇甫拾遺冉從弟補

闕紆

伏奏隨廉使周行外冗負白髭空受歲丹陛不朝
天秉燭千官去垂簾一室眠羨君青瑣裏並冕入
爐煙

故吏部郎中贈給事中韋公挽歌二首

神理今何在斯人竟若斯
顏淵徒有德伯道且無
兒白髮今非老青雲數有奇
誰言夕郎拜翻向夜臺悲

社里東城接松阡此地開
聞笳春色慘執紼故人
哀終日南山對何時渭水迴
仁兄與恩舊相弔泣泉臺

和韓郎中揚子津翫雪寄嚴維

雪深揚子岸看柳盡成梅
山色潛知近潮聲只聽
來夜禽驚曉散春物受寒摧
粉署生新興瑤華寄

上才

送王牧往吉州謁王使君叔

細草綠汀洲王孫耐薄遊
年華初冠帶文體舊弓
裘野渡花爭發春塘水亂流
使君憐小阮應念倚門愁

廣陵送林宰

清政過前哲香名達至尊
明通漢家籍重識府公
恩春景生雲物風潮斂
雪痕長吟策羸馬青楚入

關門

贈衛南長官赴任

吏曹難茂宰主意念疲人更事文犀節還過白馬
津雲間辭北關樹裏出西秦爲報陶明府裁書莫
厭貧

自常州還江陰途中作

處處空籬落江村不忍看無人花色慘多雨鳥聲
寒黃霸初臨郡陶潛未罷官乘春務征伐誰肯問
凋殘

潤州楊別駕宅送蔣侍御收兵歸揚州

沴氣清金虎兵威壯鐵冠揚旌川色暗吹角水風
寒人對輜輶醉花垂睥睨殘美歸丞相閣空望舊

門欄

李嘉祐集卷上

李嘉祐集卷下

五言律詩

仲夏江陰官舍寄裴明府

萬室邊江次孤城對海安
朝霞晴作雨濕氣晚生
寒苔色侵衣桁潮痕上井闌
題詩招茂宰思爾欲
辭官

送夏侯審參軍遊江東

袖中多麗句未遣世人聞
醉夜眠江月閒時逐海
雲荻花寒漫漫鷗鳥暮
群群若到長沙苑漁家更
待君

送袁員外宣慰勸農畢赴洪州使院

聖主臨前殿，殷憂遣使臣。
氣迎天詔喜，恩發土膏春。
草色催歸棹，鶯啼爲送人。
龍沙多道里，流水自相親。

送侍御史四叔歸朝

淮南頻送別，臨水惜殘春。
攀折隋宮柳，淹留秦地人。
含情歸上國，論舊見平津。
更接天津近，餘花映綬新。

登楚州城望驛路十餘里山村竹林相次

交映

十里山村道，千峰櫟樹林。
霜濃竹枝亞，歲晚荻花深。
草市多樵客，漁家足水禽。
幽居雖可羨，無那子牟心。

奉陪韋潤州遊鶴林寺

野寺江城近，雙旌五馬過。
禪心超忍辱，梵語問多羅。
松竹閒僧老，雲煙晚日和。
寒塘歸路轉，清磬隔微波。

奉酬路五郎中新除工部員外見贈

一門同秘省，萬里作長城。
問絹蓮花府，揚旌細柳營。
詞鋒偏却敵，草奏直論兵。
何幸新詩贈，甘輸小

謝名

送韋司直西行

不耻青袍故尤宜白髮新
心朝玉皇帝貌似紫陽人
湘浦眠銷日桃源醉度春
能文兼證道莊叟是前身

送上官侍御赴黔中

莫向黔中路令人到欲迷
水聲巫峽裏山色夜郎西
樹隔朝雲合猿窺曉月啼
南方饒翠羽知爾飲清溪

送元侍御還荆南幕府

迢遞荊州路山多水又分
霜林淡寒日胡鴈蔽南雲
八坐由持節三湘亦置軍
自當行直指應不爲功勳

登盜城浦望廬山初晴直省齋勅催赴江

陰

西望香爐雪千峰晚色新
白頭悲作吏黃紙苦催人
多負登山屐深藏漉酒巾
傷心公府內手板日相親

九日

惆悵重陽日空山野菊新
蒹葭百戰地江海十年

人歎老看衰柳傷秋對白蘋孤樓聞夕磬塘路向
城闔

九日送人

晴景應重陽高臺愴遠鄉水澄千室倒霧卷四山
長受節人逾老驚寒菊半黃席前愁此別未別已
沾裳

春日淇上作

淇水春風漲鴛鴦逐浪飛清明桑葉小度雨杏花
稀衛女紅粧薄王孫白馬肥相將踏青去不解惜
羅衣

送從叔陽冰祗召赴都

自小從游價多由戲笑偏常時矜禮數漸老荷優
憐見主承休命爲郎貴晚年伯喈文與篆虛作漢
家賢

送友人入湘

聞說湘川路年年古木多猿啼巫峽雨月照洞庭
波窮海人還去孤城鴈共過青山不可極來往自
蹉跎

送裴貞外往江南

分務江南遠留驩幕下榮楓林綠楚塞水驛到滄

城岸草知春晚沙禽好夜驚風帆幾度泊處處暮潮聲

登秦嶺

南登秦嶺頭迴望始堪愁漢闕青門遠高山藍水流三湘遷客去九陌故人游從此辭鄉淚雙垂不復收

送張惟儉秀才入舉

清秀過終童携書訪老翁以吾爲世舊憐爾繼家風淮岸經霜柳關城帶月鴻春歸定得意花送到東中

送韋侍御赴湖南幕府

執憲隨征虜逢秋出故關雨多愁郢路葉下識衡山地遠從軍樂兵強分野閒皇家不易將此去未應還

同皇甫冉赴官留別靈一上人

法許廬山遠詩傳休上人獨歸雙樹宿靜與百花親對劫雖留興觀空已悟身能令折腰客遙想竹房春

送客遊荊州

草色隨駘馬悠悠共出秦水傳雲夢曉山接洞庭

春帆影連三峽猿聲在四鄰青門一分手難見杜陵人

與鄭錫遊春

青門垂柳長回首獨心傷日暖臨芳草天晴憶故鄉映花鶯上下過水蝶悠颺借問同行客今朝淚幾行

五言排律

和袁郎中破賊後經剡縣山水上太尉

受律仙郎貴長驅下會稽鳴笳山月曉搖旆野雲低翦寇人皆賀迴軍馬自嘶地閒春草綠城靜夜烏啼破竹清閩嶺看花入剡溪元戎催獻捷莫道事攀躋

送評事十九叔入秦

白露沾蕙草王孫轉憶歸蔡州新戰罷郢路去人稀謁帝不辭遠懷親空有違孤舟看落葉平楚逐斜暉北闕見端冕南臺當繡衣唯余播遷客只伴鷓鴣飛

贈王八衢

丹地偏相逐清江若有期腰金才子貴剖竹老人遲桂檝閒迎客茶甌對說詩渚田分邑里山桂樹

李善文集卷下
杲魚心靜無華髮人和似古時別君遠山去幽獨
更應悲

入睦州分水路憶劉長卿

北闕忤明主南方隨白雲沿洄灘草色應接海鷗
群建德潮已盡新安江又分回看嚴子瀨朗詠謝
安文雨過暮山碧猿吟秋日曛吳洲不可到刷鬢
為思君

奉和杜相公長興新宅即事呈元相公

意有空門樂居無甲第奢經過容法侶雕飾讓侯
家隱樹重簷肅開園一徑斜據梧聽好鳥行藥寄

名花夢蝶留清簟垂貂坐絳紗當山不掩戶映日
自傾茶雅望歸安石深知在叔牙還成吉甫頌贈
答比瑤華

七言律詩

送朱中舍游江東

孤城郭外送王孫越水吳洲共爾論野寺山邊斜
有徑漁家竹裏半開門青楓獨映搖前浦白鷺閑
飛過遠村若到西鄰征戰處不堪秋草自傷魂

送竇拾遺赴朝因寄中書十七弟

自嘆未霑黃紙詔那堪遠送赤墀人老為僑客偏

相戀素是詩家倍益親妻兒共載無羈思鴛鴦同行不負身憑爾將書通令弟唯論華髮愧頭巾

自蘇臺至望亭驛人家盡空春物增思悵
然有作因寄從弟紆

南浦菰蒲覆白蘋東吳黎庶逐黃巾野棠自發空
流水江燕初歸不見人遠樹依依如送客平田渺
渺獨傷春那看迴首長洲苑烽火年年報虜塵

承恩量移宰江邑臨鄱江悵然之作

四年謫宦滯江城未厭門前鄱水清誰言宰邑化
黎庶欲別雲山如弟兄雙鷗爲底無心狎白髮從
他繞鬢生悵閒眠臨極浦夕陽秋草不勝情

題靈臺縣東山村主人

處處征胡人漸稀山村寥落暮烟微門臨蒼莽經
年閉身逐嫖姚幾日歸貧妻白髮輸殘稅餘寇黃
河未解圍天子如今能用武祇應歲晚息兵機

傷歛州陳二使君

憐君辭滿卧滄洲一旦云亡萬事休慈母斷腸妻
獨泣寒雲慘色水空流江村故老長懷惠山路孤
援亦共愁寂寞荒墳近漁浦野煙朝暮即千秋

同皇舟玄登重玄閣

高閣朱欄不厭遊
蒹葭白水遶長洲
孤雲獨鳥川光暮
萬井千山海氣秋
清梵林中人轉靜
夕陽城上角偏愁
誰堪遠作秦吳別
離恨歸心雙淚流

宋州東登望題武陵驛

梁宋人稀鳥自啼
登艫一望倍含悽
白骨半隨河水去
黃雲猶伴郡城低
平陂戰地花空落
舊苑春田草未齊
明主頻移虎符守
幾時行縣向黔黎

晚登江樓有懷

獨坐南樓佳興新
青山綠水共爲隣
爽氣遙分隔浦岫
斜光徧照渡江人
心閒鷗鳥時相近
事簡魚竿私自親
只憶帝京不可到
秋琴一弄欲沾巾

遊徐城河忽見清淮因寄趙八

自緣遲暮憶滄洲
翻愛南河濁水流
初過重陽惜殘菊
行看舊浦識群鷗
朝霞映日同歸處
暝柳搖風欲別秋
長恨相逢即分手
含情掩淚獨回頭

題遊仙閣

仙冠輕舉竟何之
薜荔緣階竹映祠
甲子不知風馭日
朝昏唯見雨來時
霓旌翠蓋終難遇
流水青山空所思
逐客自憐雙鬢改
焚香多負白雲期

送鄭正則之漢陽迎婦

錦字相催鳥極飛
郎君暫脫老萊衣
遙想雙眉待人畫
行看五馬送潮歸
望夫山上花猶發
新婦江邊鶯未稀
令秩和鳴真可羨
此行誰道負春輝

送皇甫冉往安宜

江臯盡日唯煙水
君向白田何日歸
楚地蒹葭連海迥
隋朝楊柳映堤稀
津樓故市無行客
山館荒城閉落暉
若問行人與征戰
使君雙淚定沾衣

晚發咸陽寄同院補遺

征戰初休草又衰
咸陽晚眺淚雙垂
去路全無千里客
秋田不見五陵兒
秦家故事隨流水
漢代高墳對石碑
回首青山獨不語
羨君談笑萬年枝

早秋京口旅泊章侍御寄書相問因以贈之

移家避寇逐行舟
厭見南徐江水流
吳越征徭非舊日
秣陵凋弊不宜秋
千家閉戶無砧杵
七夕何人望斗牛
祗有同時驄馬客
偏題尺牘問窮愁

秋晚招隱寺東峰茶宴送內弟閻伯均歸

江州

萬畦新稻傍山村
數里深松到寺門
幸有香茶留釋子
不堪秋草送王孫
煙塵怨別唯愁隔
井邑蕭

條誰忍論莫怪臨歧獨垂淚魏舒偏念外家恩

酬皇甫十六侍御曾見寄此公時貶舒州

司馬

自顧衰容累玉除忽承優詔赴銅魚江頭鳥避青
旄節城裏人迎露網車長沙地近悲才子古郡山
多憶舊廬更枉新詩思何苦離騷愁處亦無如

暮春宜陽郡齋愁坐忽聞枉劉七侍御新

詩因以酬答

子規夜夜啼楮葉遠道逢春半是愁芳草伴人還
易老落花隨水亦東流山臨睥睨恒多雨地接瀟

湘畏及秋唯羨君為周柱史手持黃紙到滄洲

送舍弟

諸謝偏推永嘉守三何獨許水曹郎老兄鄙思難
儔匹令弟清詞堪比量疊嶂入雲藏古寺高秋背
日轉南湘定知馬上多新句早寄袁溪字八行

送從弟永任饒州錄事參軍

一官萬里向千溪水宿山行漁浦西日晚長煙高
岸近天寒積雪遠峯低蘆花渚裏鴻相叫苦竹叢
邊猿暗啼聞道慈親倚門待到時蘭葉正萋萋

送馬將軍奏事畢歸滑州使幕

李嘉林集卷下
吳門別後陷滄洲帝里相逢俱白頭自歎馬卿常
帶病還嗟李廣未封侯棠梨宮裏瞻龍衮細柳營
前著豹裘想到滑臺桑葉落黃河東注荻花秋

聞逝者自驚

亦知死是人間事年老聞之心自疑黃卷清琴總
爲累落花流水共添悲願將從樂看真訣又欲休
官就本師兒女眼前難喜捨彌憐雙鬢漸如絲

江湖秋思

趨陪禁掖鴈行隨遷向江潭鶴鬢垂素浪遙疑八
谿水青楓忽似萬年枝嵩南春徧傷魂夢壺口雲

深隔路岐共望漢朝多霈澤蒼蠅早晚得先知

五言絕句

春日歸山

自覺勞鄉夢無人見客心空餘庭草色日日伴愁
襟

遠寺鐘

疎鐘何處來度竹兼拂水漸逐微風聲依依猶在
耳

白鷺

江南綠水多顧影逗輕波終日尋雲裏山高柰若

何

六言

白田西憶楚州刺史君弟

山陽郭裏無潮野水自向新橋魚網平鋪荇葉鷓
鷄閒步稻苗秣陵歸人惆悵楚地連山寂寥却憶
士龍賓閣清琴綠竹蕭蕭

七言絕句

夜宴南陵留別

雪滿前庭月色閒主人留客未能還預愁明日相
思處匹馬千山與萬山

題前溪館

兩年謫宦在江西舉目雲山每自迷今日始知風
土異潯陽南去鷓鴣啼

過烏公山寄錢起員外

雨過青山猿叫時愁人淚點石榴枝無端王事還
相繫腸斷蒹葭君不知

寄王舍人竹樓

傲吏身閒笑五侯西江取竹起高樓南風不用蒲
葵扇紗帽閒眠對水鷗

題韋潤州後亭海榴

江上年年小雪遲年光猶報海榴知
寂寂山城風日暖謝公含笑向南枝

送崔十一弟歸北京

潘郎美貌謝公詩銀印花驄年少時
楚地江臯一爲別晉山沙水獨相思

訪韓司空不遇

圖書風流似長康文詞體格効陳王
蓬萊對去歸常晚叢竹間飛滿夕陽

題道虔上人竹房

詩思禪心共竹間任他流水向人間
手持如意高

廳裏斜日沿江千萬山

秋朝木芙蓉

水面芙蓉秋色衰繁條倒是茗花時
平明露滴垂紅臉似有朝愁暮落悲

袁江口憶王司勳王吏部二郎中起居十

七弟

京華不啻三千里客淚如今一萬雙
若箇最爲相憶處青楓黃竹入袁江

李嘉祐集卷下終

耿漳集卷上

五言古詩

發南康夜泊瀨石中

倦客乘歸舟春溪杳將暮群林結暝色孤泊有佳
趣夜山轉長江赤月吐深樹颯颯松上吹泛泛花
間露險石俯潭渦跳湍礙沿沂豈唯垂堂戒兼以
臨深懼稍出回鴈峰明登斬蛟柱連雲向重山杳
未見鍾路

過王山人舊居

故宅春山中來逢夕陽入汲少井味變開稀戶樞

澁樹朽鳥不栖階閒雲自濕先生何處去惆悵空
獨立

晚次昭應

落日向林路東林吹麥隴藤草蔓古渠牛羊下荒
塚驪宮戶久閉溫谷泉長湧爲問全盛時何人最
榮寵

七言古詩

聽早蟬歌

蟬鳴兮夕曛聲和兮夏雲白日兮將短秋意兮已
滿乍悲鳴兮欲長猶嘶澁兮多斷風蕭蕭兮轉清

韻嘒嘒兮初成依婆娑之古樹思遼落之荒城閒
院支頤深林倚策猶惆悵而無語鬢星星而已白
蘆花動

連素穗翻秋氣細節踈莖任長吹共作月中聲孤
舟發鄉思

賦得寒蛩

爾誰造鳴何早趯趯連聲徧階草復與夜雨和遊
人聽堪老

五言律詩

宣城逢張二南史

全家宛陵客文雅世難逢寄食年將老干時計未
從秋來句曲水雨後敬亭峰西北長安遠登臨恨
幾重

題童子寺

半偈留何處全身棄此中雨餘沙塔壞月滿雪山
空聳刹臨回磴朱樓間碧叢朝朝日將暮長對晉
陽宮

夏日寄東溪隱者

月華浮野草色合遙空處處山依舊年年事不
同閒田孤壘外暑雨片雲中惆悵多塵累無由訪

釣翁

之江淮留別京中親故

長雲迷一鴈漸遠向南聲已帶千霜鬢初爲萬里
行繁蟲滿夜草連雨暗秋城前路諸侯貴何人重
客鄉

太原送許侍御出幕歸東都

昔隨劉越石今日獨歸時汾水風煙冷并州花木
遲荒庭增別夢野雨失行期莫向山陽過隣人夜
笛悲

華州客舍奉和崔端公春城曉望

不語看芳徑悲春嬾獨行
向人微月在報雨早霞
生貧病催年齒風塵掩姓名
賴逢驄馬客郢曲緩
羈情

題清蘿翁雙泉

側弁向清漪門中夕照移
異源生暗石疊響落秋
池葉擁沙痕沒流回草蔓隨
冷冷無限意不獨遠
公知

酬李文

落照長楊苑秋天渭水濱
初飛萬木葉又長一年
人貧病仍爲客艱虞更問津
多慙惠然意今日肯

相親

贈嚴維

許詢清論重寂寞住山陰
野路接寒寺閉門當古
林海田秋熟早湖水夜漁深
世上窮通理誰人柰
此心

春日題苗發竹亭

春亭及策上郎吏謝玄暉
閒詠踈篁近高眠遠岫
微偏宜留野客暫得解朝衣
猶憶東溪裏雷雲掩
故扉

題孝子陵

荒墳秋陌上霜露正霏霏松栢自成拱苦廬長不
歸浮埃積蓬鬢流血存麻衣何必曾參傳十年至
行稀

題莊上人房

不語焚香坐心知道已成流年衰此世定力見他
生暮雪餘春冷寒燈獨晝明尋常五侯至敢望下
階迎

宋中

日暮黃雲合年深白骨稀舊村喬木在秋草遠人
歸廢井莓苔厚荒田路徑微唯餘近山色相對似

依依

秋夜思歸

來時獨暑服今已露漫漫多雨逢秋霽深秋生夜
寒投人心似切為客事皆難何處無留滯誰能暫
問看

送李端

世上許劉禎洋洋風雅聲客來空改歲歸去未成
名遠近天初暮關河雪半晴空懷諫書在回首戀
承明

送崔明府赴青城

清冬賓御出蜀道翠微間遠霧開群壑初陽照近
關霜潭浮紫菜雪棧繞青山當似遺民去柴桑政
自閒

送王將軍出塞

漢家邊事重竇憲出臨戎絕漠秋山在陽關舊路
通列營依茂草吹角向高風更就燕然石行看奏
虜功

南中留別

東西無定客風雨未休時惘然此中別飄零何處
期青山違舊隱白髮入新詩歲歲迷津路生涯漸

可悲

送楊將軍

一身良將後萬里討烏孫落日邊陲靜秋風鼓角
喧遠山當磧路茂草向營門生死酬恩寵功名豈
敢論

送夏侯審遊蜀

暮峰和玉壘回望不通秦更問蜀城路但逢巴語
人石林鶯囀曉板屋月明春若訪嚴夫子無嫌卜
肆貧

送張侍御赴郴州別駕

取遠集卷五
六
佐郡人難料分襟日復斜一帆隨遠水百戶過長
沙明月江邊夜平陵夢裏家王孫對芳草愁思杳
無涯

送苗贊赴陽翟丞

夕陽秋草上去馬弟兄看年少初辭闕時危遠效
官山行獨晚雨旅宿二陵寒詩興生何處嵩陽羽
客壇

送絳州郭參軍

遠事諸侯出青山古晉城連行麴水閣獨入議中
兵夜雨新田濕春風曙角鳴人傳府公政記室有

參卿

常州留別

萬里南天外求書禹穴間往來成白首旦暮見青
山夜浦涼雲過秋塘好月間殷勤陽羨桂別此幾
時攀

關山月

月明邊檄靜戍客望鄉時塞古柳衰盡關寒榆發
遲蒼蒼萬里道戚戚十年悲今夜青樓上還應照
所恩

代宋州將淮上乞師

脣齒幸相依危亡故遠歸身輕百戰出家在數重
圍上將堅深壘殘兵闔落暉常聞鐵劍利早晚借
餘威

秋晚臥疾寄司空拾遺曙盧少府綸

寒几坐空堂踈髯似積霜老醫迷舊疾朽藥誤新
方晚果紅低樹秋苔綠徧墻慙非蔣生徑不敢望
求羊

贈海明上人

來自西天竺持經奉紫微年深梵語變行苦俗流
歸月上安禪久苔生出院稀梁間有馴鴿不去復

何依

津亭有懷

津亭一望鄉淮海晚茫茫草沒栖洲鷺天連映浦
檣往來通楚越旦暮易漁商惆悵緘書畢何人向
洛陽

晚投江澤浦即事呈柳兵曹泥

落日過重霞輕煙上遠沙移舟衝荇蔓轉浦入蘆
花斷岸迂來客連波漾去槎故鄉何處在更道向
天涯

東郊別業

東臯占薄田耕種過餘年護藥栽山刺澆蔬引竹
泉晚雷期稔歲重霧報晴天若問幽人意思齊沮
溺賢

早朝

鍾鼓餘聲裏千官向紫微冒寒人語少乘月燭來
稀清漏聞馳道輕霞映瑣闈猶看嘶馬處未啓掖
垣扉

屏居塾屋

百年心不料一卷日相如乘興偏難改憂家是強
爲縣城寒寂寞峰樹遠參差自笑無謀者祇應道

在斯

進秋隼

豈悟因羅者迎霜獻紫微夕陽分素臆秋色上花
衣舉翅雲天近回眸燕雀稀應隨明主意百中有
光輝

賦詠宣州筆

寒竹漸虛受纖毫任幾重影端緣守直心勁懶藏
鋒落紙驚風起搖空 露濃丹青與 事捨此復
何從

春日洪州即事

鍾陵春日好春水滿南塘竹宇分朱閣桐花間綠
楊蹉跎看鬢色留滯惜年芳欲問羈愁發秦關道
路長

雪後宿王純池州草堂

宿居湖上宅琴韻靜參差夜雪入秋浦孤城連貴
池流年看共老銜酒發中悲良會應難再晨雞自
有期

旅次漢故時

我行過漢時寥落見孤城邑里經多難兒童識五
兵廣川桑遍綠叢薄雉連鳴惆悵蕭關道終軍願

請纓

過三郊驛却寄楊評事時此子郭令公欲
有表薦

冉冉青衫客悠悠白髮人亂山孤驛暮長路百花
新終歲行他縣全家望此身更思君去就早晚問
平津

隴西行

雪下陽關路人稀隴戍頭封狐猶未翦邊將豈無
羞白草三冬色黃雲萬里愁因思李都尉畢竟不
封侯

巴陵逢洛陽鄰舍

因君知北事
流浪已忘機
久客多人識
高年衆病歸
連雲湖色遠
度雪鴈聲稀
盡說家林盡
悽傷淚滿衣

哭張融

早歲能文客
中年與世違
有家孀婦少
無子弔人稀
總帳塵空暗
銘旌雨不飛
依然舊鄉路
寂寞幾回歸

送友貶嶺南

暮年從遠謫
落日別交親
湖上北飛鴈
天涯南去

人夢成湘浦
夜淚盡桂陽
春歲月茫茫
意何時雨露新

耿漳集卷下

五言排律

春日即事

芳菲那變易年鬢自蹉跎
室與千峰對門唯二仲
過宦情知已少生事託人多
草色微風長鶯聲細
雨和幾時猶滯拙
終日望恩波縱欲論相報無如
漂母何

仙山行

深溪人不到杖策獨緣源
花落尋無徑雞鳴覺近
村數翁皆藉草對奕復傾樽
看畢初爲局歸逢幾

世孫雲迷入洞處水別出山門惆悵歸城廓樵柯
迹尚存

得贄後書懷上第五相公

誰語恓惶客偏承願盼私應逾骨肉分敢忘死生
期山縣唯荒壘雲屯盡老師庇人寧自代食蘖謬
相推黃綬名空罷青春鬢又衰還來掃門處猶未
報恩時獨立花飛滿無言月下遲不知丞相意更
欲遣何之

入塞曲

將軍帶十圍重錦制戎衣猿臂銷弓力虬鬚長劍
威首登平樂宴新破大宛歸樓上姝姬笑門前閭
客稀暮烽玄兔急秋草紫騮肥未奉君王詔高槐
晝掩扉

逢姚校書因送之河中

十年相見少一歲又還鄉去住人惆悵東西路渺
茫古陂無茂草高樹有殘陽委棄秋來稻凋疎採
後桑月輪生舜廟河水出關墻明日過閭里光輝
芸閣郎

題清源寺

儒墨兼宗道雲泉隱舊廬孟城今寂寞輞水自紆

餘內學銷多累西林易故居深房春竹老細雨夜
鐘踈陳跡留金地遺文在石渠不知登座客誰學
蔡邕書

奉送蔣尚書兼御史大夫東都留守

副相威名重春卿禮樂崇錫珪仍拜下分命遂居
東高旆翻秋日清鏡引細風蟬稀金谷樹草徧德
陽宮教用儒門儉兵依武庫雄誰云千載後周召
獨爲公

喜侯十七校書見訪

東城獨屏居有客到吾廬發廩因春黍開畦復翦
蔬許醅令乞酒辭窶任無魚徧出新成句更通未
悟書藤絲秋不長竹粉雨仍餘誰爲湏張燭涼空
有望舒

晚春青門林亭燕集

都門連騎出東野柳如絲秦苑看山處王孫逐草
時歡遊難再得衰老是前期林靜鶯啼遠春深日
過遲落花今夕思秉燭古人詩對酒當爲樂雙杯
未可辭

晚秋東遊寄猗氏第五明府解縣韓明府
步出青門去踈鐘隔上林四郊多難日千里獨歸

心暮鳥聲偏苦秋雲色易陰亂墳松栢少野徑草
茅深霸淚袁安履汾南宓賤琴何由聽白雪祗益
淚霑襟

奉和元承杪秋憶終南舊居

白玉郎仍少羊車上路平秋風搖草遠舊業起高
情亂樹通秦苑重原接杜城溪雲隨暮淡野水帶
寒清廣樹留峰翠間門響葉聲近樵應已燒多稼
又新成解佩從休沐承家豈退耕恭侯有遺躅何
事學泉明

晚夏即事臨南居

何須學從宦其奈本無機蕙草芳菲歇青山早晚
歸廣庭餘落照高枕對閒扉樹色迎秋老蟬聲過
雨稀艱難逢事異去就與時違遙憶衡門外蒼蒼
三徑微

省試驪珠詩

是日重泉下言探徑寸珠龍鱗今不逆魚目也應
殊掌上星初滿盤中月正孤酬恩光莫及照乘色
難踰欲問投人否先論按劍無儻憐希代價敢對
此冰壺

元日早朝

九陌朝臣滿三朝候鼓賒遠珂時接韻攢炬偶成
花紫貝爲高闕黃龍建大牙參差萬戟合左右八
貂斜羽扇分朱檻金鑪隔翠華微風傳曙漏曉日
上春霞環珮聲重疊蠻夷服等差樂和天易感山
固壽無涯渥澤千年聖車書四海家盛明多在位
誰得守蓬麻

送歸中丞使新羅

遠國通王化儒林得使臣六君丞典冊萬里奉絲
綸雲水連孤棹恩私在一身悠悠龍節去渺渺蜃
樓新望裏行還暮波中歲又春昏明看日御靈怪
問舟人城邑分華夏衣裳擬縉紳他時禮命畢歸
路勿迷津

贈興平鄭明府

海內兵猶在關西賦未均仍勞持斧使尚宰茂陵
人遙夜重城掩清宵片月新綠琴聽古調白屋被
深仁跡與儒生合心惟靜者親深情先結契薄宦
早趨塵貧病休何日艱難過此身悠悠行遠道冉
冉過良辰明主知封事長沮笑問津棲遑忽相見
欲語淚霑巾

和王懷州觀西營秋射

謝公親校武草碧露漫漫落葉停高駕空林滿從
官迎籌皆疊鼓揮箭或移竿名借三軍勇功推百
中難主皮山郡晚飲算柳營寒明日開鈴閣新詩
雙玉盤

晚登虔州即事寄李侍御

章溪與貢水何事會波瀾萬里歸人少孤舟行路
難春光浮曲浪暮色隔連灘花發從南早江流向
北寬故交參盛府新角聳危冠楚劍期終割隋珠
惜未彈酒醒愁轉極別遠淚初乾願保喬松質青
青過大寒

奉和第五相公登鄱陽郡城西樓

茂德爲邦乂豐貂舊相尊發生傳雨露均養助乾
坤曉肆登樓目銷戀闕寃女墻分吏事道啓
津門盜浦潮聲盡鍾陵暮色繁夕陽移夢土芳草
接湘源封內群氓復兵間百賦存童牛耕廢畝壕
木遶新村野步漁聲溢荒祠鼓舞喧高齋成五字
遠岫發孤猿一顧承英達多榮及子孫家貧仍受
賜身老未酬恩屬和瑤華曲堪將繫組綸

甘泉詩并序

甘泉美良牧也覃懷舊水鹹鹵人多被患天愍遺

昨是生王公惠和既敷妙用潜應頃修壘虞寇鑿
井便漑忽遇醴泉香美若飴遂命水工浚濶餘泥
葺欄備綆維人所欲萬瓶繼絜道路紛紛旣蠲諸
邪亦愈群瘵豈止夫宜盥漱之用增烹飪之味客
乃率然遂賦茲什異井甘如醴深仁遠未涯氣寒
堪破暑源淨自蠲邪修綆懸冰甃新桐蔭玉沙帶
星凝曉露拂霧湧秋華綠溢涵千仞清泠飲萬家
何能葛洪宅終日閉煙霞

七言律詩

發綿津驛

孤舟北去暮心傷
細雨東風春草長
杳杳短亭分水陸
隆隆遠鼓集漁商
千叢野竹連湘浦
一派寒江下吉陽
欲問長安今遠近
初年塞鴈有歸行

塞上曲

慣習干戈事鞍馬
初從少小在邊城
身微久屬千夫長
家遠多親五郡兵
嬾說疆場曾大獲
且悲年鬢老
長征塞鴻過
盡殘陽裏樓上
悽悽暮角聲

路旁老人

老人獨坐倚官樹
欲語潛然淚便垂
陌上歸心無產業
城邊戰骨有親知
餘生尚在艱難日
長路多

逢輕薄兒綠水青山雖似舊如今貧後復何為

贈別劉員外長卿

清如寒玉直如絲世故多虞事莫期建德津亭人
別夜新安江水月明時為文易老皆知苦謫宦無
名倍足悲不學朱雲能折檻空羞獻納在丹墀

宿萬固寺因寄嚴補闕

雪隨樵客到青冥因禮山僧宿化城鍾梵已休初
入定有無皆離本難名雲開半夜千林靜月上中
峰萬壑明為報故人雷處士塵心終日自勞生

岐陽客舍呈張明府

逸妻稚子應溝壑歸路茫茫東去遙涼葉下時心
悄悄空齋夢裡雨蕭蕭星霜漸見侵華髮生長虛
聞在聖朝知己只今何處在故山無事別漁樵

奉和李觀察登河中白樓

城上高樓飛鳥齊從公一遂躡丹梯黃河曲盡流
天外白日輪輕落海西玉樹九重長在夢雲衢一
望杳如迷何心更和陽春奏况復秋風聞戰輦

朝下寄韓舍人

侍臣鳴珮出西曹鸞殿分階翊綵旄瑞氣迴浮青
玉案日華遙上赤霜袍花間焰焰雲旗合鳥外亭

亭露掌高肯念萬年芳樹裏隨風一葉在蓬蒿

賀李觀察禱河神降雨

質明齋祭北風微騶馭千群擁廟扉王帛纔敷雲
淡淡笙鏞未撤雨霏霏路邊五稼添膏長河上雙
旌帶濕歸若出敬亭山下作何人敢和謝玄暉

上將行

蕭關掃定犬羊群閉閣層城白日曛櫪上驂駟嘶
鼓角門前老將識風雲旌旗四面寒山映絲管千
家靜夜聞誰道古來多簡冊功臣唯有衛將軍

許下書情寄張韓二舍人

謫宦軍城老更悲近來頻夜夢丹墀銀杯乍減中
心火金鑷唯多兩鬢絲常遶綠苔聞鴈處滿庭黃
葉閉門時故人高步雲衢上肯念前程杳未期

九日

重陽寒寺滿秋梧密在南樓顧老夫步蹇強登遊
藻井髮稀那更插茱萸橫空過雨千峰出大野新
霜萬葉枯更望樽中菊花酒殷勤能得幾回沽

送大谷高少府

縣屬并州北近胡悠悠此別宦仍孤應知史筆思
循吏莫料轅門笑魯儒古塞草青宜牧馬春城月

聊齋集卷下
九
暗好啼烏凋殘貴有親仁術梅福何須去隱吳

同李端春望

二毛羈旅尚迷津萬井鶯花雨後春宮闕參差當
晚日山河迤邐靜纖塵和風醉裏承親客芳草歸
時失意人南北東西各自去年年依舊物華新

嶽祠送薛近貶官

枯松老栢仙山下白帝祠堂枕古遶遷客無辜祝
史告神明有喜女巫知遙思桂浦人空去遠過衡
陽鴈不隨度嶺梅花翻向北回看不見樹南枝

送友人遊江南

遠別悠悠白髮新江潭何處是通津潮聲偏懼初
來客海味唯甘久住人漠漠煙光前浦晚青青草
色定山春汀洲更有南迴鴈亂起聯翩北向秦

五言絕句

秋日

反照入閭巷憂來與誰語古道無人行秋風動禾
黍

秋夜

高秋夜分後遠客鴈來時寂寞重門掩無人問所
思

慈恩寺殘春

雙林花已盡葉色上殘芳若問同遊客高年最斷腸

早次眉縣界

足馬曉路歸悠悠渭川道晴山向孤城秋日滿白草

七言絕句

路傍墓

石馬雙雙當古樹不知何代公侯墓墓前靡靡春草深唯有行人看碑路

代園中老人

傭賃難堪一老身皤皤力役在青春林園手種唯吾事桃李成陰歸別人

古意

雖言千騎上頭居一世生離恨有餘葉下綺窓銀燭冷含啼自草錦中書

涼州詞

國使翻翻隨旆旌隴西岐路足荒城氍毹收馬胡雛小日暮蕃歌三兩聲
耿漳集卷下終

